



# FLOR DI TRINITARIA

UN GRUPO DI BAILE DEDICA NA MANTENE NOS  
CUSTIMBERNAN BIBO

Grupo di baile “Flor di Trinitaria “ a ser funda ariba dia 27 di Juli 1987, y ta forma parti di un grupo mas grandi, cual ta “Grupo Bini Bini”. Como despedida di Pastoor Vijvenberg e grupo a wordo lanta y for di e dia ey e a keda existi pa mantene e parti folklórico y cultural di nos ritmonan y bailenan. E grupo tabata bow direccion di Sra. Filomena Tromp, kende ainda tin e tarea aki. Na principio e instructor tabata sr. Marcial Kock y despues Maria Giel y Filomena a sigui cu e trabow aki. E edad di e damanan ta varia entre 70 y 85 aña, y di e cabayeronan entre 60 y 81 aña. Den transcurso di añanan Flor di Trinitaria a actua den diferente Centro di Bario, Hotelnan y tambe mensualmente den Bon Bini Festival. Pa nos grandinan nan a baila na Paviljoen y na Huize Maristella y anualmente nan ta presenta na e celebracion di Himno y Bandera na St. Anna School na Noord. Flor di Trinitaria a baila tambe ariba varios ocasion na Bonaire, incluyendo ariba dia 6 di september 1992 en coneccion cu nan celebracion di Himno y Bandera.







Flor di Trinitaria ta mantene un repertorio ariba ritmonan di Danza, Tumba, Wals y Fox, semper ariba ritmo di caha di orgel, teniendo cuenta cu e edad di e miembronan. E wals ta di origen Europeo, y a bin den e hemisfero aki cu e Europeanonan cu a goberna e continente Latino y e islanan di Caribe. E ta mas bien un baile di salon mescos cu mazurca, polka, marcha y quadrilla.

Fox ta bini di e ritmo Americano Fox Trot (1918) cu a ser treci Aruba den añanan 20 pa e Americanonan cu a bin establece e refinaria. E fox a keda y te cu dia di awe e ta wordo usa como un di e ritmonan tipico di Aruba.

E trahe di e grupo pa su presentacionnan ta e asina yama "Saya cu Jackie" (cu ta significa e "jacket" Ingles) cu tabata e trahe social tradicional di damanan Arubiano, cu segun potretnan di antaño tabata ser usa casi 200 aña pasa caba na Aruba. E hombernan semper ta baila cu nan flus, ya cu e bailenan aki ta "Bailenan di Salon".

E parehanan ta Camilio Maduro y Irma Maduro, Carlos Dake y Nata Wolff, Johannes Krozendijk y Fransisca Leyba, Dominico Bermudez y Chichi Gomez, Canisio Maduro y Maria Christiaans – Tromp. E grupo ta conta tambe cu un bailarina di spare, Margo Kelly.

